

**PDRM Guna SOP Tangani Bersih 3.0 - Hishammuddin**  
**mStar Online**  
**Jun 11, 2012**  
**Oleh ARIFFUDDIN ISHAK**

**KUALA LUMPUR:** Polis Diraja Malaysia (PDRM) menggunakan prosedur operasi standard (SOP) yang betul bagi mengawal keadaan semasa kekecohan perhimpunan Bersih 3.0 pada 28 April lalu.

Menteri Dalam Negeri, Datuk Seri Hishammuddin Tun Hussein berkata, PDRM bertindak mengikut SOP bagi memastikan keadaan terkawal dari menjadi ganas sehingga boleh mengancam keselamatan dan ketenteraman awam.

"Pada masa yang sama polis perlu bertindak dengan cepat bagi memastikan keadaan terkawal.

"Walaupun bagaimanapun KDN memandang serius sebarang pelanggaran SOP yang ditetapkan.

"Dua anggota polis telahpun didakwa di Mahkamah. Selain itu, perkara ini akan disiasat dengan lebih teliti melalui penubuhan Jawatankuasa Panel Penasihat Bebas yang dipengerusikan oleh Tun Mohammed Hanif Omar," katanya menerusi jawapan bertulis di Dewan Rakyat di sini, Isnin.

Beliau menjawab pertanyaan Fong Po Kuan (DAP-Batu Gajah) yang ingin mengetahui SOP terperinci kepada anggota polis yang bertugas untuk memastikan perhimpunan berjalan dengan selamat dan aman.

Selain itu menerusi jawapan bertulis berasingan, Po Kuan juga ingin mengetahui jumlah tembakan gas pemedih mata yang dilepaskan oleh anggota keselamatan sewaktu perhimpunan Bersih 3.0 pada 28 April lalu.

"Secara keseluruhannya sebanyak 907 butir 'tear gas' telah digunakan ketika perhimpunan Bersih 3.0 lalu.

"Ini termasuk 909 butir 'shell tear smoke' dan 58 butir 'grenade tear smoke'," kata Hishammuddin menjawab soalan tersebut.

Tambah Hishammuddin, kerajaan menanggung kos keseluruhan sebanyak RM1.8 juta akibat penganjuran perhimpunan haram tersebut.

Hakcipta Terpelihara © 1995-2012 Star Publications (Malaysia) Bhd

Source:

[http://mstar.com.my/berita/cerita.asp?file=/2012/6/11/mstar\\_berita/20120611184413&sec=mstar\\_berita](http://mstar.com.my/berita/cerita.asp?file=/2012/6/11/mstar_berita/20120611184413&sec=mstar_berita)